



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 8

Yangia anidakangma :

f Tir Yimyim

ig tiryimyim@aolima

yt tir yimyim

TAPAK 7

Suryakumar Yadav ano IPL asaya ishika masayatetsü

Mitkar anemba telok yaritsü lanurtem kelakoktsü: Min Aung Hlaing



VOL. XXI ISSUE NO. 166 (ADOK 166) DIMAPUR ROGONÜ (FRIDAY) METSÜREMI (MARCH) 29, 2024 ₹ 5.00

Nagaland nung district ti nung AFSPA atsülangogo

Dimapur, Metsüremi/March 28 (TYO): Central sorkari Nagaland nung district ti nung Armed Forces (Special Powers) Act, 1958 ano ita trok atema atsülangtsüogo aser district pongu kübok police station 21 ita trok atema 'disturbed areas' ta sangdongogo.

Ministry of Home Affairs (MHA) ajanga agütsüba iba totuyuba ya April 1 nungi mapa kuma aotsü aser jelia magienra ita trok tashi alitsü.

MHA ajanga sangdong ka nung AFSPA ya Nagaland nung aliba Dimapur, Niuland, Chümoukedima, Mon, Kiphire, Noklak, Phek, aser Peren district tem nung atsülangtsür, ta ashi.

Maneni Zunheboto, Mokochung, Kohima, Wokha, aser Longleng districts tem nung aliba police station 21 iba Act kübok alitsü, ta ashi.

Item police station ya Kohima

district kübok Khuzama, Kohima North, Kohima South, Zubza aser Kezocha, Mokochung district kübok Mangkolemba, Mokochung-I, Longtho, Tuli, Longchem aser Anaki 'C', Longleng district kübok Yanglok, Wokha district kübok Bhandari, Champang, aser Ralan aser Zunheboto district kübok Ghatashi, Pughoboto, Satakha, Suruhuto, Zunheboto aser Aghunato alitsü.

Item tesemtem ya Armed Forces (Special Powers) Act, 1958 indang Section 3 kübok 'disturbed areas' ta sangdong.

Nagaland nung law and order tensa asadangba sülen iba Act ya atsülanga liasü.

AFSPA yagi security forces nem tashi balaka agütsür aser iba nung warrant meliaka nisung aputsü aser warrant meliaka ki telungi aitsü mesüra ki telung meita aotsü temelaba dena lir.

Tuensang nung ENPO aser ENLU senden mentar

Dimapur, Metsüremi/March 28 (TYO): Aruya aliba Lok Sabha election nung ENPO-i shilem agütsü ENLU aser MP ajanga mesüzteter asü masü, ta nüburtemi rangloker lir.

Mapang talangka nungi yongya ataba Eastern Nagaland People's Organization (ENPO) aser Eastern Nagaland Legislature's Union (ENLU) senden CKS Hall, Tuensang HQ nung temendak lir, kong ENLU züngsem 20 den Rajya Sabha MP aser 13th NLA nungi ex-parliamentarians tema shilemagitar.

Tuensang HQ nung March 19 nü public meeting ka amendang ENPO dang ENLU züngsem 20 prong den public meeting ka hopta ka tsüngta amentsü nungloksüba nung ajemdaker iba senden ya amener.

Tanü, Brehostibarnü amenba senden ya mezüngbo March 19 nü amentsü liasü, saka ENLU züngsemtem Central lenirtem ajurutsü Delhi-i aoba mechi medentet.

Tanü iba senden nung tribal presidents aser general secretaries tem den Central Executive Council (CEC) züngsemtem, talk team executive secretaries, frontal organisation indang tir aser tongti zülurtem den executive züngsemtem, federating unit tirtem, taoba ENGOA, ENWO aser ENSF tirtem adener.

Iba senden ya Rev. Achu, Executive Secretary, (CBLT) ajanga sarasadema tenzük, kong W. Manwang Konyak, Secretary ENPO menden liasü.

R. Tsapikiu Sangtam, ENPO tir ajanga pela agizükba o jemi aser ENLU chairman ajanga o tatsüka jembiba sülen senden nung jembitsü atema agenda tem benoka liasü.

Iba osang züluba tashinung R. Tsapikiu Sangtam, ENPO tir ajanga pela agizükba o jemi aser ENLU chairman ajanga o tatsüka jembiba sülen senden nung jembitsü atema agenda tem benoka liasü.

GOOD FRIDAY SODI
Alima meimchirtem temenen nungi kümzüksü asoshi Yisu Khrista asüba anogo bilemteta amongba 'Good Friday' anogo nung sarasadema amongtsü asoshi Tir Yimyim office tanü March 29, 2024 nü shibanger, anungji March 30, 2024 Tir Yimyim adok malitsü.
- Ketdangsür, Tir Yimyim.

DIMAPUR AO BAPTIST AROGO HEALING MINISTRY TANEPSTÜ SENTONG
DABA Main Church nung April 3, 2024 anepdang 7:00 AM nungi sentong tenzüksü. Tamang agi nisung ajak arua adentsü pelashishia jaoker. Tsüngrem asoshi kecha tamakoktsü mali. Yisui la dang ashi "Tenü, ne tamang agi na junga kümogo... junga liang." Mark 5:34
Sd/-
Pastor, DABA.

Lok Sabha election 2024 atema nomination papers scrutiny temogo



Commissioner Nagaland & Returning Officer, Sushil Kumar Patel IAS ajanga Kohima nung General Observers P. Ramesh IAS aser Avinash Champawat IAS nungertem lia Lok Sabha Election 2024 atema Nagaland state nungi candidate tem indang nomination papers asadangba mapang tangokba noksa ka yangi angur.

Dimapur, Metsüremi/March 28 (TYO): Nagaland state nungi candidate temi Lok Sabha Election 2024 atema nomination papers agütsüba March 28, 2024 nü General Observers P. Ramesh, IAS aser Avinash Champawat, IAS nungertem lia Commissioner Nagaland & Returning Officer, Sushil Kumar Patel, IAS ajanga scrutiny süogo.

Iba mapang Election

Commission of India (ECI) ajanga electoral guidelines aser eligibility criteria agütsüba nung shia aliba ama National Democratic Progressive Party (NDPP) nungi Dr. Chumben Murry, Congress (INC) nungi S. Spongmeren Jamir aser Hayithung Tungoe Lotha, Independent (IND) nungertem candidate ama shimogo, ta sangdong ka ajanga ashi.

Congress nungi chichiba

candidate indang nomination papers shidak alinung, substitute candidate indang nomination paper magizük, ta ashi.

Election maparen ochishia inyaksü mechi NDPP candidate Dr. Chumben Murry, IND candidate Hayithung Tungoe Lotha aser INC candidate S. Spongmeren Jamir melen teshimtet nisung yokba lia iba scrutiny maparen inyaka liasü, ta sangdong ajangasa ashi.

PM Modi, Nadda aser Shah nungeri Nagaland & Manipur atema nübu ayimtsü

Dimapur, Metsüremi/March 28 (TYO): Nagaland aser Manipur nungi Lok Sabha Election 2024 nung tokteptsü atema BJP candidate asoshi Bhartiya Janata Party (BJP) ajanga star campaigners tenüngtem sangdongogo.

Item rongnung Ato Kilonser Narendra Modi, BJP tir JP Nadda, Union Home Minister Amit Shah aser Union Defence Minister Rajnath Singh nungertem dena lir.

Nagaland nungi Lok Sabha nung menden ka atema BJP-i candidate kata meyoker, saka People Democratic Alliance indang candidate asütsü atema NDPP nungi Dr Chumben Murry shima lir.

Centre nung BJP sorkari

Frontier Nagaland Territory agütsütsü nangzükba ama meinyakba ajanga Eastern Nagaland nüburtemi election nung shilem magitsü amokmerena lir, anungi BJP lenirtem iba region-i aiddaktsütsü melatsü asü masüar mejangja.

Nagaland nung Lok Sabha election ya April 19 nü agütsü.

Ano Lok Sabha Elections asoshi nübuyimtsü atema PM Modi-i Manipur semdangtsü asü masüar mejangja. Manipur nung May 3, 2023 nü azüdokshi tenzükba sülen ato kilonseri iba state ano mesemdangi lir.

Ajidang masü pai Manipur nung aliba nüburtem dang yimjung asoshia ola adoka mali.

Pai Manipur indang sentong ka nung khen jembidanga lir aser ibaji Parliament Monsoon Session tenzükdang liasü.

Inner Manipur Parliamentary Constituency atema BJP candidate asütsü Th Basanta Sing-i nomination agütsüogo. Outer Manipur Parliamentary Constituency atema NDA indang candidate ama NPF nungi Kachui Timothy Zimik shima lir.

Manipur nung Lok Sabha election ya noklem ana sadanger agütsü. Outer Manipur aser Inner Manipur shilem kar atema April 19 nü vote agütsütsü aser Inner Manipur nung tanüngba polling stations nung vote ya April 26 nü agütsütsü.

ECI-i 1-Nagaland P/C atema Observers shimogo

Dimapur, Metsüremi/March 28 (TYO): 1-Nagaland Parliamentary Constituency nungi Lok Sabha atema General Election 2024 asoshi Election Commission of India (ECI) ajanga Observers shimogo.

Iba dak sendakba nung sangdong ka ajanga ashiba agi, Dimapur, Peren, Kohima, Phek, Zunheboto, Wokha aser Pughoboto district tem atema General Observer inyaksü P. Ramesh, IAS shim aser pa indang contact number 9863844113 alitsü.

9863844113 alitsü.

General Observer, Avinash Champawat, IAS nem Chümoukedima, Tseminyu, Mokochung, Mon, Tuensang, Longleng, Kiphire, Noklak aser Shamator district tem nungloksü aser pa indang contact number 9863902371 alitsü.

Dimapur, Chümoukedima, Peren, Kohima, Phek, Mokochung, Tseminyu aser Pughoboto district tem atema Expenditure Observer inyaksü Vivek Chauhan, IRS shimogo

aser pa indang contact nung 9863898256 alitsü.

Zunheboto, Wokha, Mon, Tuensang, Longleng, Kiphire, Noklak aser Shamator district tem atema Expenditure Observer ama Satya Batra, IRAS shimogo aser pa indang contact number 9863894951 alitsü.

Maneni Nagaland state atema Police Observer asütsü Suresh Kumar Jain, IPS shimogo aser pa indang contact number 9863898256/6909377316 alitsü ta sangdong ajangasa ashi.

Manipur Inner Lok Sabha menden atema nisung trok tokteptsü

Imphal, Metsüremi/March 28 (Agencies): Brehostibarnü Election Commission of India (ECI) ajanga Inner Manipur Parliamentary Constituency nung Lok Sabha elections April 19 nü agütsü aliba nung tokteptsü atema candidate trok agizükogo aser candidate ka (independent) indang nomination paper magizük.

Inner Manipur Parliamentary Constituency indang Returning Officer, Thokchom Kirankumar-i candidate trok indang

nominations agizük aser candidate ka magizük.

District Commissioner's office, Imphal West nung aliba RO indang office nung candidate tenet indang nomination paper tem asadangba sülen iba mera ya agia liasü.

Candidate trok ya Congress nungi Dr. Angomcha Bimol Akoijam, BJP nungi Thounaojam Basanta Kumar, RPI (Athawale) nungi Maheshwar Thounaojam, Rashtriya Janhit Sangharsh Party

(RJSP) nungi Moirangthem Totomshana Nongshaba, regional Manipur People's Party nungi Rajkumar Somendro Singh @ Kaiku aser independent candidate Haorongbam Sarat alitsü.

Universal Family Party nungi Ngasepam Nilakanta indang nomination magizük.

Ajisüaka March 30 nü candidate withdrawal date tembangba sülen ang shidakba candidate tem jangjatsü.

Entrepreneurs Associates-i "Uplifting Women Street Vendors Program" ayongzüka agi



Dimapur, Metsüremi/March 28 (TYO): Entrepreneurs Associates-i, parnok indang "Uplifting Women Street Vendors Program" ajanga Financial Literacy dak sendakba nung yokyatsüyar aser aggregators tem nem tangazükba agütsüsü asoshi Arunachal Pradesh kübok kinuk nung aliba tesem ka semdangogo.

The Entrepreneurs Associates (tEA) aser Capri Loans na longjemer, Arunachal Pradesh, Tirap District nung Namsang Block kübok Deomali jila nung March 28 nü lendi nung yokyatsüyaba tetsürtem atema parnok indang "Uplifting Women Street Vendors" sentong ayongzüka katsüogo. 2017 küm iba sentong tenzüka sülen Arunachal Pradesh tang agi tanabenbuba iba sentong ayongzüka agiogo.

Brehostibarnü iba sentong nung Deomali jila temeket nung aliba yimsüing balala nungi tetsür 50-i shilem agia liasü.

Sentong ya tEA nung Content Writer Chubatemen lenisüba nung agi, shibai tEA tenzüka aser nükjidong indang lemsatepa liasü. Paisa, budgeting, expense management, savings,

investments, aser digital payments amala indang metedakja liasü. Maneni pai, nükjidong tejangja ayutsü aser nüngdak makaba nung sen intokba tajemba kümdaktsüsü atema sen aruba aser aoba angatetsü koda tongtibang iba indang lemsatep.

Kasa mapang nung Khajen Farmers Producer Company Limited, CEO Chanem Thingnok-i, temzüing ozüing kübok parnok temeden balala indang metedakja liasü. Laisa, basic amenities tem koda amshitetsü, nüburtem kanga aika adenshiba tesem nungi ainshitsü atema anogo 30 atakzüksüba aser parnok shishilembatsü atema tesem balala mekazüksütsü temeden aliba indang metedaktsü. Thingnok-isa, Legal Service Authority Act of 1987 kübok angati legal teyari angutsü aliba indang metedaktsü.

Maneni sentong nung tEA Community Mobiliser Supongchiba-i, The Entrepreneurs Associates financial wing indang metedakja liasü.

Sentong nungsa training nung shilem agirtem tenüing nung SONA SHG lenir Yalik

Lowang-i, Namsang amala tesem ka nung kong lendi nung yokyatsüyartem rongsen agi kanga anünger iba amala tesem kati arua tangazükba tajung agütsüba atema Entrepreneurs Associates dang kanga pelaba lemsatep.

Uplifting Women Street Vendors Program ya Entrepreneurs Associates indang flagship sentong ka lir koba alu nungi tsünütetba chiyongtsütem ayokba nung sendaka aliba tetsürtem nem tangazükba agütsüsü atema 2017 küm October ita amenoka liasü.

Tang tashi nung tEA-i Nagaland, Manipur, Assam, aser Arunachal Pradesh nung lendi nung yokyatsüyaba tetsür 7000 dak tema nem training agütsüogo.

Iba sentong kübok tEA-i, financial & business management, skills training, health & legal services, mentorship aser market den sendaktepba aser Zero Interest Loans dak sendakba nung training agüja arudar. 2025 küm tashi nungbo tetsür lendi nung yokyatsüyar 10,000 iba sentong ajanga ayimjemtsü tEA nükjidong lir.

DEO office Kohima-i Form 12-A indang metedaktsü

Dimapur, Metsüremi/March 28 (TYO): SDO (c) Sadar & Nodal Officer, Postal Ballot Kohima-i sangdong ka ajanga, Lok Sabha General Election dak sendakba nung Western Angami, 9 Kohima Town, 10 Northern Angami, 11 Northern Angami, 14 Southern Angami-I aser 15 Southern Angami-II Assembly segment nung election duty ata aliba personnel ajak dang Election Duty Certificate (EDC) agütsüsü

atema Form 12-A ya March 27 nü nungi tenzüka Postal Ballot Cell/Revenue Branch, 3rd Floor DC Office Kohima nung angutsü ta metedaktsüogo.

Kasa sangdong ajangsa, Form 12-A ya kanga junga fill up sür Election Duty Detailment/Requisition Order, aser EPIC copy kaka dena benoktsü metedaktsüogo. Form 12-A ya April 5 nü tashi nungbo benoktsüla.

Temetetsük kaji Election

Duty atema shimba personnel tem rongnung Sector Magistrates, Sector Commanders, Micro Observers, election achaayangba Cell balala staff tem, gari anir, merekmejur amala ajak densema lir.

Maneni Presiding Officers, Polling Officers, Grade IV staff, polling team meina aoertem amala Polling Personnel tem atema Form 12-A ya training agiba tesem nung agütsüsü.



Taruba Lok Sabha Election dak sendakba nung IV staff/MTS (tetsür aser tebur) atema 1buba training sentong Mokokchung Deputy Commissioner & District Election Officer-i ayongzüka March 28 nü Town Hall, Mokokchung nung agiogo.

Dimapur nung mejangjaba tasü mang ka nguteta lir

Dimapur, Metsüremi/March 28 (TYO): March 28 nü arishi küm 40 nungi 45 tsüingda asütsü ta bilemba mejangjaba tebur (non-local) tasü mang ka Thahekhu Block-2 nung railway track den atonga kilentsü ka nung nguteter aliba indang osang Sub-urban Police Station, Dimapur nem agüja liasü.

Osang angazükba dak ajemdaker duty party iba tesemi ao aser tasü mang indang bushisüingdanga liasü, koba shiatoker liasü. Ajisüaka iba nisungba ya kodasür asü iba

indang mejangja. Asüsang yagi anüing sentsüh jean aser anüing sentsüh tola semer liasü.

Temzüing ozüing dak ajemdaker jenjang ajak agiba sülen tasü mang ya PM examination/identification atema District Hospital Dimapur Morgue-i benerogo.

Asüsanger kinunger aser medemertem dang Officer-in-Charge, Sub-urban Police Station, Dimapur. (Mobile No. 7085055026) den tongteprateptsü mepeshia metedaktsüogo.

Community Health Care sentong agi



Impur, Metsüremi/March 28 (TYO): Impur Christian Hospital ajanga Community Health Care sentong ka Merangkong nung March 28, 2024, anogo kanga takok ngua agiogo.

Iba sentong nung palliative patient dena arua temang anepalua liasü. Ajak agi nisung 106 nem treatment tajung den mozü agüja anebalua liasü.

Tanü temang anepaluba mapa ya ajak asoshi kangasa tongtipang shilem ka lir. Aji oda, ajakibo mozü ki bushia temang anepalu mesüteter

asünung nüngdakba pur ajak tongtetsü asoshi iba sentong agiogo.

Dr. Aka Longchar, MS, ICH aser Dr. Abigail, Medical Officer, ICH tena leniba nung iba sentong agi.

Maneni Impur Christian Hospital ajanga yimsüingtem kwikatisa odir Tsüingrem tatenba lia aika asoshi teyari tulu anguba mapang süangma, ta sarasadema ataba Impur Christian Hospital, Board of Trustees Chairman, Dr. Sashimeren Aier-i sangdong ka ajanga lemsatep.

April 3 nü Candidate aser political party tem den senden amentsü

Dimapur, Metsüremi/March 28 (TYO): Additional Deputy Commissioner (HQ) & ARO, Benjamin Longkap-i sangdong ka ajanga, election nung tokteptsü aliba candidate aser political party tem den General Observers tem senden ka April 3 nü 11 ako nungi tenzüka 1-Nagaland Parliamentary Constituency Commissioner & RO office nung amentsü ta metedaktsüogo.

Ken o dak sendaka alirtem ajak senden nung arua shilem agitsü mepeshia metedaktsüogo.

Tanga sangdong ka ajanga ADC & ARO-isa, EVM/VVPAT tanabuba Randomisation 1- Nagaland Parliamentary Constituency Commissioner & Returning Officer indang office nung April 3 nü 12:30 ako nungi agitsü mapang melenshiba metedaktsüogo.

Peren District Medical Board senden menogo

Dimapur, Metsüremi/March 28 (TYO): Medical inyakim dak ajemdaker polling personnel tem election duty nungi taitok agütsüsü atema Peren District Medical Board senden March 28 nü Peren jila kübok ADC Office conference hall nung menogo.

atema mepeshiba asadang aser parnok nem taitok agüja liasü.

Medical board nung SDO civil, Kelevituo Nisa, Dr. Niriethono Zetsuvi, Medical Superintendent, District Hospital, Peren; Dr. Lanuakum Dy. CMO, Peren; Dr. Kekhrielhoutho Sophie, Junior Medical Specialist, District Hospital Peren aser Pauding, EAC nunger densema liasü.

Senden nung züngsemtemi polling personnel kari parnok temang nung timtem aliba ajanga election duty meyoktsü

Kejriwal CM menden nungi agientsü mepishiba court-i magizük



March 28, 2024 nü New Delhi nung aliba Rouse Avenue court nung Delhi excise policy ken o angadanga sülen Delhi Chief Minister aser AAP tongti lenir, Arvind Kejriwal meyipa aodang tangokba noksa nung angur.

New Delhi, Metsüremi/ March 28 (Agencies): Enforcement Directorate (ED)-i Delhi excise policy ken o dak sendakba nung Chief Minister Arvind Kejriwal apuba sülen kari pa Chief Minister menden nungi agientsü atema temepishiba ken o ka benoka liasü saka Brihostibarnü Delhi High Court-i iba temepishibaji magizük.

Delhi High Court-i, item ama ken o nungji judicial tiyongtsüü ia inyaktüsü legal tsütsülen nungi tajemdakdak mali, ta metetdaksü.

Acting Chief Justice Manmohan aser Justice Manmeet PS Arora nati, Kejriwal Delhi nung maneni Chief minister inyakba nokdangtsüsa legal tsütsülen nungi tajemdakdak mali, ta metetdaksü.

Court-isa temepishiba ken o agütsüsang dang, Kejriwal Chief Minister menden nungi

agientsüsa legal tsütsülen nungi tajemdakdak ali asü?, ta asüngdang. Court-isa, linük temzüng tsütsü tamakok kar danga adokra ibaji linük Tir mesüra Lieutenant Governor-i inyaktüsü; iba dak alia court-i President's rule atema benoktsü makok, ta ashi.

Acting Chief Justice-i, court-i yimtenren onüktem nungi pilaa alitsüla, anungji item ama telemtetba yabo Executive tashi kübok lir, ta ashi.

Delhi nung alir aluyimer aser social worker, Surjit Singh Yadav-i, Kejriwal-i maneni Chief Minister mapa inyakba ajanga legal inyakyim nung tetsükdaksü ajurutsü aser state nung temzüng kübok inyakyim raksatsü, ta metetdakja Kejriwal CM menden nungi agientsü atema High Court nem temepishiba ken o agüja liasü.

Yadav-isa, senotsü tsütsü ochimashi tai tonglokja aliba

Chief Minister kati maneni office mapa abentsü makok, ta metetdakja liasü.

Brihostibarnü Kejriwal, Rouse Avenue Court matsüngdangi anir oa liasü. Enforcement Directorate-i maneni parnok ket nung Kejriwal yur asüngdangyatsü atema mapang meshisem.

Kejriwal-i, iba ken o ya yimtenren tsütsülen nungi asalentong tamajung yangluba lir, anungji pai court nung ochi jungkai adoktsütsü, ta metetdakja liasü.

Rouse Avenue Court nungji Kejriwal kinüngtsü, Sunita Kejriwal aser Delhi cabinet minister tem den AAP MLA tema aika liasü.

Delhi excise policy ochimashi ken o dak sendakba nung March 21 nü Enforcement Directorate nungi ketdangsertem Kejriwal'er kidangi oa pa dang asüngdangyaba sülen pa pua liasü.

Pakistan nungi phone ajanga BJP aser Cong lenirtem amokmeren

New Delhi, March 28 (Agencies): Lok Sabha elections agitsü mapang ana nung lia Congress aser BJP naprongla nungi lenirtemi Pakistan nungi phone ajanga parnok amokmerener, ta metetdaksü.

Iba dak sendakba osangji Chandigarh nung Senior Superintendent of Police (SSP) nem metetdaksü aser lenirtem jagi security meshi.

State Congress Tir, HS Lucky aser BJP State Secretary, Sanjeev Rana naprongla amokmerenogo.

Mongolbarnü HS Lucky-i WhatsApp ajanga +92 number ajanga Punjabi oshi nung pa amokmeren, ta metetdaksü.

Deputy mayor elections mapang nunga pa amokmerena liasü.

Ano külen BJP lenir, Sanjeev Rana-ia March 19 nü

WhatsApp number ajanga Pakistan nungi pa amokmerenba osang metetdaksü. Iba tatalokba sülen pai police nem iba osangji metetdaksü saka ketdangsertemi tang tashi nung kecha mesüteter.

Police-i item tatalokba bushisüngdang tenzükogo. Item amokmerenji atangji asü kari asayamenüa amokmerenbaar mejangjar.

Punjab nung sorkar chireptsütsü meranger: Saurabh Bharadwaj

New Delhi, March 28 (Agencies): AAP nungi Lok Sabha MP, Sushil Kumar Rinku-i BJP nung adenba sülen anogo ka lir Brihostibarnü AAP lenir, Saurabh Bharadwaj-i, Punjab nung 'Operation Lotus' tenzükogo, ta metetdaksü.

BJP-i state sorkartem atsingdoktsü atema MLA tem alizüker, ta tai tonglokja opposition party temi iba dangji 'Operation Lotus' ta ajar.

Osangbenertem senden ka nung Bharadwaj-i, Punjab nung AAP MLA tem teimbakati parnok dangi phone süa sen agi mesüzüksü merangba den BJP nung denra Y category security agütsütsü aser taruba Lok Sabha election atema tickets agütsütsü ta shia mesüzüker ta shiogo, ta metetdaksü.

"BJP-i 'Operation Lotus' tenzükogo," ta pai ashi.

Bharadwaj-isa Rinku-i BJP nung adentsü atema telemtetba agiba asoshi tasüngdangba aka.

"Punjab nung (2022 küm assembly election nung) AAP, Shriomani Akali Dal aser Congress sülen BJP jenjang pezübuba nungang liasü. Süra kechiba Rinku-i BJP nung aden. Pa Lok Sabha nung MP kümsüka tembangogo. Jalandhar Lok Sabha election nunga BJP jenjang pezübuba nung ang asütsü," ta paisa metetdaksü.

Rinku ya Jalandhar Lok Sabha menden atema AAP candidate shima liasü saka Bodhbarnü pa den AAP nungi Jalandhar West MLA, Sheetal Angural nati BJP nung aden.

Yaküm Rinku-i Congress toktsür AAP nung aden aser Jalandhar Lok Sabha by election atema toktepa liasü. Lok Sabha nung pai BJP kanga aija aruogo aser senden nung longkak aitba atema senden nungia anenja liasü, saka tang pai BJP nung adenba ajanga aika süngmanger.

BJP-i pa Lok Sabha election nung toktepdaktsütsüa akok.



March 28, 2024 nü Nadia district nung TMC candidate, Mahua Moitra-i Lok Sabha election atema nüboyimdang tangokba noksa nung angur.

Bengaluru cafe nung bomb pokdaksüba ken o nung nisung ka puogo

New Delhi, March 28 (Agencies): March 1, 2024 nü Bengaluru nung aliba Rameshwaram Cafe nung bomb pokdaksüba tatalokba dak sendakba nung National Investigation Agency (NIA)-i aibelener ka puogo, ta Brihostibarnü osang ka ajanga metetdaksü.

Tai tonglokja alisangji Muzammil Shareef lir ta jangjaogo. Pa ya bomb pokdaksütsü atema asalentong yanglur rongnung densema lir ta melung malemer. NIA team-i Karnataka nung tesem 12, Tamil Nadu nung tesem pongu aser Uttar Pradesh nung tesem ka mita oa liasü.

March 1 (Hokokbar) nikongdang 12:30 ako meta Bengaluru kübok Whitefield kiyong nung aliba kanga nüngtugu Rameshwaram cafe nung bomb tesashi ka apokba lendong nungji cafe nung inyaker staff asem densema nisung ter yirua liasü.

March 3 nü NIA-i iba ken o agizükba sülen mezüng bushisüngdangba mapang nung tongti aibelensangji, Mussavir Shazeeb Hussain lir ta jangjaa liasü. Bomb pokdaksüsangji pa liasü.

Iba dak alia iba lendong agütsütsü atema asalentong yanglurtem rongnung Abdul Matheen Taha-a densema lir ta jangja.

Mussavir Shazeeb Hussain aser Abdul Matheen Taha naprong tang tashi jenshia senzüdar.

March 17 nü NIA- iba ken o dak sendakba nung nisung asem meyong kiji mita aoba den külemi parnok meyong dokantem-a mita ao. Mita aoba mapang nung NIA-i digital oset kar den sen aika pua liasü.

March 1 nü iba lendong atalokba sülen Deputy Commissioner of Police aser Bomb Detection & Disposal Squad nungi ketdangsertema Rameshwaram Cafe tonga oa liasü.

Iba anogo nungji Mussavir Shazeeb Hussain-i korang den mask ka agir yangkhu nung bomb ji miima bener cafe jagi atu. Cafe nungi pa langka meshia chir ayazüka aoba sülen mapang tatsüka tsüngda bomb ji apok.

Tamalen NIA-i aibelener apuba nung yariteper nem senpet sen lakh 10 agütsütsü sangdongba den külemi bomb pokdaksüsang noksa-a lemsatepa liasü.



New Delhi, March 28, 2024: Brihostibarnü New Delhi nung Ukraine Foreign Minister, Dmytro Kuleba-i Rajghat semdanga Mahatma Gandhi nem akhüm agütsüsdang tangokba noksa nung angur.



TIR YIMYIM

YIMOBILEM (EDITORIAL)

DIMAPUR ROGONÜ, MARCH (METSÜREMI) 29, 2024

Tajung Hokolbar (Tajung Rogonü)

Yisu asenok menen asoshi kangki nung asüba anogo ya anogo tajung masü, kechiyong ibai Tsüngrem chir temenen purtem ket nung reshikangshi timtem aser maksü ajuruba anogo lir ta asenokibo bilemer. Atangji, Yisu kangki nung angenloka yutsürbo menoknok anoka alima manga akümdang, Pa kangki nung angenlokang ta ayimtenertem asoshia ibai tetsübutüsü aser shisabolutsü anogo tamajung ka liasü. Ajisüaka, kechiba iba anogo dang ya 'Tajung Hokolbar' mesüra asenok Ao oshi nung jatetba ama 'Tajung Rogonü' ta ajar? Asenoki bilemetsü agibo, alima nung atalokyonga aruba anogotem rongnung, tang tashi nungbo, Yisu asüba anogo yasa tamajungtiba aser tamangtiba asütsü tim. Atangji, alima nung nisung tsütsü bilemetsübo, tasür shia arutsüba, nüpoker ngudaktsüba, shiranger aneptsüba, temenen tanüla aridoktsüba aser onseta endoktsü lia nüktapangtatsür tashi kümzüksang, Yisu asüba anogo yasa tejashitiba anogo asütsüla. Iba jagiang Germany nungbo iba anogo dang ya 'Tejashi anogo' ta ajar. Ajisüaka, kodang Tsüngrem tsütsü bilemdangdir, Yisu Khrista alima nung Pa mapa temer kangkidong nung asüba anogoji alima meimchir temenen nungi kümzüksü asoshi Tsüngremer sentong atalokba anogo lir. Yisubo timatem saka Pa timatempa agiang asenok samatsü aliba tia nungi kümzük aser Yisui maksü aremba agiang asenok maksü mapatem ajak nembangtsü. Yisu asüba anogoji alima meimchirtem atema Tsüngrem temeim jungkai adokba anogo liasü. Pa temeim agi asenok temenen jenti liaka, asenokibo temenen memenadang amato kenyongi kodanga mangutsü aser mebiletettsüsa nembangtsüogo ta 1 Peter 4:8 ajanga angatetdaksüner. Ibayongji, Yisu asüba anogo ya meimchir asoshibo temenen nungi alangzükba anogo tajung liasü. Asenok temenen nung liasüba mapang, asenok tesamar lia, mapang shitak nung, asenok temenen purtem kümzüksü asoshi Yisu asü ta Rom tapu 5 tekong 6 nungi 10 tashi nung angutsü. Yisubo timatem, maksü ajuru saka asenok asoshibo Pa asübaji osang tajung lir. Joko, asenok mesamatsü kechiyong asenok temenen nung samatsü aser asütsü melena Pa asü. Hokolbar nü atalokba ajanga bener aruba osang tajungji aji lir. Atangji, Yisu alima meimchirtem temenen nungi kümzüksü asübaji temeshi mapa lir. Iba jagi karibo temeshi mapaji tajung asüba agi 'Tajung Hokolbar' ta aja südi ta bilemer. Ano, ajak dang tongtibangtiba mapa tajung kaji, Yisu asüba agi tasü madak takok ngua shia aru. Asenok asoshi ibajisa osang tajungtiba lir. Tsüngrem chir Yisu dak amangertembo kodanga mesamatsü saka teti taküm alitsü ta Yohan 3:16 nung ashiba osang tajungji aji lir. Yisu sür shia maru asünungbo asenok taküm ya alima nung khen lir teti atema samatsüba liasü, saka Yisu sür shia aruba ajanga asenok teti tatem maka taküm alitsüba jenjang tuluka ka alangzükttetogo. Aji oda, Yisubo asenok menen asoshi asü saka asenoki Pa dak mamangra asenoki Pa timatempa aser Pai asenok atema taküm tenla agütsübaji mezügmeshir asütsü. Item purtemjibo temerenshi dak teti taküm makai alitsü ta 2 Tesalonika 1:9 nung shia angutsü. Yisu kangki nung asübaji asenok taküm aser tanüla jenjang jungdaktsütsü asoshi asü süra, atangji, Pa asüba anogoji asenok asoshi tajung lir. Iba jagi pa asüba Hokolbar anogoji temeshi aser tajung anogo lir ta angateter. Yisui asenok teti tatem maka tekümzükdak asen tanüla dang masü saka tasü nungia shia arur asenok temang dena alitsü asoshi Pa taküm tenla agütsüogo. Asenok teinyaktsü mapa ajunga agi, Yisu asenok menen asoshi asü aser P shia aru aser ano Pa tanaben asenoki anii arutsü ta amangtsüla. Iba tamang nung asenokbo Yisu Khrista maru tashi tajung tajung dang inyaka alitsü asoshi ajungshir. T.Ken 37:3 nung, kechi tia nung lidir liaka, Kibuba dak dang amanga asenokbo tajung tajung dang inyakang ta shia angutsü. Ajangla, Yisu asübaji asenok asoshi tajung süra Yisu asoshi asenok timatemtsübajia Tsüngrem asoshi tajung asütsü. Yisubo asenok asoshi timatem saka asenokbo Yisu asoshi timatemtsü ta masü, mesüra Yob-i ashi ama, asenokbo tajung tajung dang agitsüba masü, saka Yisui Mathi 16:24, Mark 8:34 aser Luke 9:23 nung ashi ama, Pa tenüng nung asenoka pei kangki bentettsüsa asenok dak tamang alitsüla. Tanü tensa asenok kangkiji taremsük, ochishia aliba aser tesempar dang temeim sayuba mapatem asütsü. Yisu asüba anogoji asenok asoshi tajung ta asüba amaji, asenoki asen kangki koka aputetba anogoji Tsüngrem tsüngdanga anogo tajung asütsü.

OLEMSABANG

Naga nunger Temeden Wazüka Ayutsü Nüngdaker

-Dr.R Zulu Jamir, Kumlong Baptsit Arogo

India lima kin balala rongnung tsürabur mapang nungi Naga kin temeden ya balaka wazüka yuja lir. Tanü putu nung technology tashi tongtibangsa, Artificial Intelligence aser Radio Frequency Identification ajanga alima ajunga rongsen ketsüng (economy), shishilembaba (marketing), aser yimsüsüba tashi (political power) tzü-züng ozüng ka kübok aotsü tasa amshia aodang, asen Naga senso leniri anir nüburtem temeden wazüka ayutsü terenemba koba tashi lir? Ya Naga nunger senso tajung ajaki kanga aroka shisadangtsü mapang kati menepogo ta bilemer. Indian political tashi agi dang asen meraket sobaliba aser tamangba yimsü anokshitsüsa kümra, asen Naga kin temeden jenjang makai akümtsü.

Naga kin tejangraba aser taginüba tangar dak nungi kenyongi balaka ta asenoki meteta lir. Asen lenirtemi anir nüburtem ajaki Naga political settlement atema kümra küm jembia arur, saka temelenshibo kecha maka. Lanurtem asoshi employment aser alima asoshi development jembia aruba tanü pungmang nung shi den chiyonger sak ama kümogo. Naga nungerji India nunger dang nungi teprangtsü sentsü balaka, chiyongtsü balaka, sobaliba balaka, libaliro balaka, sübosolem balaka, oshi balaka, yimayimpong balaka, aser tamangba yimsü balaka. Item ajak dak ajemdaker Indian Constitution Article 371A nung temeden pezü agüja lir;

Religious or Social practices of the Nagas temeden Naga Customary law temeden Administration of civil criminal justice involving decisions according to Nagacustomary law temeden Ownership and transfer of land and its resources temeden Iba den 1873 küm Bengal Eastern Frontier Regulation ajanga Inner Line Permit tashi agüja aliba den, 2001 kuma Naga nunger asoshi temeden, 'The Uniqueness of Naga History' recognized agüja lir. Ano item dak alia Naga kin asoshi temeden aika lir. Süra item temeden wazüka ayutsü asoshi Naga kin koba tashi kümküma lir? Tanü Indian political tashi bener yimsüsüba sorkar ajanga India lima ajunga tamangba yimsü ka asütsü, sobaliba ka akümtsü, sobusolem ka asütsü, oshi ka asütsü, aser kechisarena ka dang asütsü ta yimyim sangdongba mapang asen Naga nunger terenemba kechi? Ya senso tajung ajaki kangasa aroka shisadangtsü nungdaker. India lima ajunga nung Khristanpurtemi dang masü, saka Hindu, Muslim, Sikh, Buddhist, aser tanga tamangba yimsü ajunga agi RSS teloki tentetba sorkar anema ola tesashi adokdang asen Nagaland kong Khristan teimba lir, yangji lenirtemi anir nüburtemia koba tashi iba tashiyim amshiba sorkar anema rarar?

Temeim amangbapur tajungtem, item ajak dang alia asen Naga nungeri Khrista tsüngdang tenangzükba tulu ka atemzüka lir. Aser iba tatemzükbaji; 'Nagaland for Christ.' Iba ya amadokra Naga nunger asoshi Tsüngrem tsüngdang Aiatai alitsü! Asen Naga nungerisa 1989 total prohibition Act passed süa Naga limaji Dry State asütsü Tsüngrem tenüng nung renem. Ano küm ter tejakdang asen Naga nungerisa Clean Election campaign tenzuka election tongpang rara arur. Naga kin ya Tsüngremi kangasa meimba kin ka ta asenoki bilemetsüla. Tsürabur tendak mangko agi konang naroküm azüker liaka, Yisu senti azü agi asenok alangzüka nüji kümdaktsüogo. Tajung meliaka Tsüngremi asen kin shimtetbaji tesüngmangtsü ka lir. 1Peter 2:10, nung shia aliba ama, 'Khen mapangbo nenok Tsüngrem nübur mesüi liasü, saka tangbo nenok Tsüngrem nübur kümogo. Khen mapang nenoki Tsüngrem taochi magizüki liasü, saka tangbo nenoki Pa taochi agizükogo.' Temeim amangbapur tajungtem, asen ajungba agi masü, saka Tsüngrem angati temeim aser taochi ajanga asenok alangzük aser ya tashi Pai asenok anir arur. Temenen lima ka nung alir asü nung asen tamang anokshitsüsa tensa tia balala ajurutsü, saka kecha nunga temulung ajema melili. Galatia 5:1, nung shia aliba ama, 'Nüjiba asoshi Khristai asenok nüji kümdaktsüogo. Anungji tanaben alar tapuba süngra nung tapu.' Yisui ashi, "Alar kidang teti malir, saka techirbo teti alir" Yohan 8:35.

Temeimbatem, asen lima tejakleni aotsü, yimchi-yimjung tzülok ama ayimtsü, sadok-sadoka amangtettsü, pei taküm aser kibong asoshi sobaliba tetsükdak malitsü, yimsüsüba tajung, tesünep, tepela, aser temeim nung iba tepur tajung Naga tenem, tarok aser lenden nung taso shia jangratema alitsü temulungjang ajak arakzua iba ocet ya zülur. Naga kin rongnunga asen Ao kinji Tsüngremi balaka jatetba ta meteta pei shimang, tanela, aser shisatsü ajak arakzua Yisu tiyongtsü südaktsür telemtetba shidak agia jajatsü ayongzük. Amen.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Russia sepaitemi Ukraine nung ano Tenla ki aika shibangtsüogo



Yaküm April ita nung Ukraine kübok Komyshuvakha yimdak Russia nung sepaitemi Orthodox Arogo Tenla ki ka poksatsüba sülen tantsür kati meraksa osetsüset bendandang tangokba noksa nung angur.

March 28, 2024: Russia nung sepaitemi Ukraine nung Khristantem anema maneni inyaka Ukraine kübok Donetsk region nung Ukrainian Greek Catholic Tenla ki aika shibangtsüogo.

Ukraine yimtiba, Kyiv nung amenoka aliba Institute for Religious Freedom (IRF)-i, taküm küm tetenzüklen nungi Russia nung sepaitemi parnok sasa parnok "Cossacks" lir ta sangdonga UGCC Tenla kitem aser Arogo meyong kiojentem aika atsünga agiogo aser Khristantem Ukrainian Greek Catholic Tenla kitem telungi meidaktsür, ta metetdaksü.

Donetsk region nung Khristantemi parnok meyong

Tenla kidangi mouteter aser tekülem sentongtem magiteter, ta IRF-i metetdaksü.

Item Tenla kitem nungi putirtema meindokogo, ta IRF-isa metetdaksü.

Joko Ukraine nung Russia-i atsünga agiba Donetsk, Luhansk, Kherson aser Zaporizhzhia regions nung putirtem mali, ta parnokisa metetdaksü.

Ukraine kübok Donetsk region nung Ukraine nunger Greek Catholic putir anabo 2022 küm November ita nung Russia nung sepaitemi pua liasü; putir ana rongnungji kabo ozüing alema Russia-i anir ogo.

Redemptorist putir, Ivan Levitsky ji Russia kübok

Rostov region nung aliba jail ka nung puoka lir, ta Kharkiv Human Rights Protection Group nungi Yevhen Zakharov-i metetdaksü.

Levitsky den külemi inyaksemer putir, Bohdan Geleta-a Russia-i atsünga agiba Crimea nung aliba jail ka nung puoka lir.

2022 küm February ita nung Russia-i Ukraine amak tenzükba sülen putir anaprongla jagi pei Arogo toktsür aotsü memelungi liasü.

Tesüiba küm ana tsünga Russia nung sepaitemi Ukraine nung Tenla kitem den Arogo kiojen 660 shi raksatsüogo; item kiojen rongnung 206 bo Protestant Khristantem meyong liasü.

Manipur nung sorkari Easter Sunday nunga office lapoktsü tuyur

March 28, 2024: Manipur state nung Holy Saturday aser Easter Sunday nüa office mapa inyakba anogotem asütsü sorkari telemtetba agiba atema India nung Khristantemi aitsür.

Nütsüng million 3.2 aliba Manipur state nung nütsüng shilem 41 bo Khristantem lir, ajisüaka March 27 nü state sorkari March 30 aser March 31 anogotem ya sorkar office ajak nung mapa inyakba anogotem asütsü, ta sangdongogo.

"March 30-31 anogotemji Public sector undertakings, autonomous bodies aser state sorkar kübok societies densema sorkar office ajak nung mapa inyakba anogotem asütsü," ta state sorkari sangdong ka ajanga metetdaksü.

"Financial year tembangtsü tesüsabuba anogo ishika tsünga office tem nung mapa junga inyaktetsü atema iba telemtetba agi," ta kasa sangdong nung shia lir.

India nung financial year ya April 1 nü tenzükler aser March 31 nü tembanger,

anungji institutions ajaki March 31 tashi nung account books shibangtsüsa akümer.

Sorkar telemtetba aija Manipur nung Arogo lenir kati, "Iba telemtetba ya yirua aliba zübo nung metzü inoktsüba amai lir," ta metetdaksü.

March 28 nü osangbener den jembidang Arogo lenir jagi, "State nung Hindu pusemba Bharatiya Janata Party sorkar lir, aser parnoki maneni Khristantem anema inyakba sayur," ta ashi.

Paisa, yaküm March 3 nü tenzükba rara tang tashi mesüngjemer, ta metetdaksü.

Yaküm May 3 nü rara tenzükba sülen tang tashi nung nisung 219 süogo aser nisung 50,000 shi sorkari lapokba relief camps nung jenoka lir. Iba rara nungsa state nung Tenla kitem densema tekülem ki 350 shi raksatsüogo.

"Sorkari tang tashi yimjung bener maruteter, ajisüaka iba ama telemsa adokdaksüba tetuyuba maneni agütsür," ta paisa shisem.

Manipur state sorkari Easter sodi anogo nung mapa

inyaktsü tuyuba aija New Delhi nung amenoka aliba United Christian Forum (UCF)-i "Linük temzüng alema tetuyuba agüja aliba ya tangsa agientsüla, kechiyong iba ya public holiday inyakyim den mapet," ta metetdaksü.

March 28 nü UCF-i sangdong ka ajanga, "State nung nütsüng shilem 41 Khristantem lir, anungji sorkar office tem nung mapa inyaker minority Khristantemi Easter amongtsüsa akümtsü," ta metetdaksü.

"State nung Khristantem takoksa ngur lia ano maneni Khristantem jashidaktsütsüsa sorkari tetuyuba agütsür," ta UCF-isa metetdaksü.

Assam Christian Forum nung otongdar, Allen Brooks-i, Easter Sunday ya Khristantem atema kanga tongtibang aser temeshitiba benjung rongnung ka lir, ajisüaka Khristantem nem sodi magütsübaaji ajanga yimjak nung India temzüng kübok secular aser democratic tangatetba anema inyaker, ta metetdaksü.

ANO GO ABEN TSÜNGREM DEN

Tanela ajanga shia aru

"Saka shibai Yisu tasü nungi shia arudaktsü Pa Tanela dak lira, Yisu Khrista tasü nungi shia arudaktsübai nenok dak aliba Pa Tanela ajanga nenok tasütsüba tamang anema taküm agütsütsü".

- Rom 8: 11.

Tsüngrem tekümtet mapa nung tongtibang tebilemba kaji tamangertem den teti alitsüba liasü. Kodang alimai temenen ait, nisung Tsüngrem tsüngdang nungi aridok. Amangra tai tadok agüja meshiteter, iba tesendaktep maneni alitsü Tsüngremi mulungtet. Ki ken merüktetra kü taküm nung Tanela Temeshi alitsü ki temsüa kümdaktsür.

Tsüngremi asameyanga mapa ajak inyak. Kibuba Yisui item ajakji terenem küma ataloktsü, aser Tanela Temeshi-i asen taküm nung anogo shia iba mapaji inyaker. Shia arubaji Tanela Temeshi ajanga inyak. Meimchir otsü nung Yisu shia aruba dang tuluba tatalokba mali.

Tekümtet temoatsütem ajak takoktsü kechiaser Khrista taküm lir. Yisu tasürtem rongnungi adok aser Pa timatempa aser asüba nung Tsüngrem temaitsü ajen. Asenok dang "Nisung kenbo asütsüla" ta ashi (Ibri 9: 27). Iba o agi tasütsü tasüngdangba ajak aidoktsü. Tanela Temeshi ajanga Yisu Khrista tasü nungi shia arudaktsü aser kasaji tamanger shia dak ataloktsü. Shia arubaji majenba asenok senmang lir.

'The Chosen' series repranger nisung million 200 dak tema jungogo

March 27, 2024: Alima mesüra küm ka ser tesadang tesem ajaklen nisung million 200 dak temai 'The Chosen' reprangogo aser ibaji alima tesem balala nung distribution partners ajanga lir.

The Chosen ya Yisu Khrista alima nung alidang Pai inyakba ministry nung ajemdaker yanglu.

The Chosen indang distribution & marketing executive vice president Kyle Young-i, "Netflix, Amazon Prime Video aser Peacock den partnership yangluba ajanga ano nisung aikati Laishiba nung ajemdaker yangluba series reprangogo," ta metetdaksü.

Tawa Brazil nung The Chosen Season 4 sayaa liasü. "Season 3 mapang nung onoki balaka inyakbaji streaming platforms aser broadcasters den partnership ulushiba liasü. 2023 jaddang app-first model liasü aser yangji Season 1 aser 2 küm ka

mesüra küm ka ser tesadang sayaa liasü. Season 3 mapang nung iba mapangji ano tatsüba aküm. Aser yakümbo iba series repranger kanga renlok," ta Young-i metetdaksü.

"The Chosen indang nükjidong kaji- akokba tashi nisung teimtiba nem reprangdaksütsü atema lir.

Iba series repranger nisung million 100 ajungtsü atema küm pezü agia liasü aser tesüiba ita 15 nung ano nisung million 100-i iba series reprangogo," ta paisa metetdaksü.

Ano külen The Chosen indang partner 'Come and See Foundation'-ibo The Chosen series repranger nisung billion 1 jungdaksütsü nükjidong yua lir.

The Chosen Season 5 taruba ita nungi tangok tenzüktsü aser season 5 jagi Yisu Khrista Kangki nung masüadang Pa Yirusalem-i aiba shilem ayimjemtsü.

AO OSHI ANGAZÜKDAK:
TANÜ ANGAZÜKTSÜBA OJANG



Süisüponger

(n) oli aruli ta jajar nisung (passer by)

* Lenjem nung süisüponger atema semtu ka yanglua lir.

Süitem

(v) oa adokba, mapang tatem akümba (passed by)

* Mapang tamajung aika süitema ogo.

OLONG PAITEP # 6741

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S ___ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6739 TELANGZÜBA

TIPIEN :

- 2. Bangsemo, 6. Tiptem, 8. Jen,
- 9. Talifa, 11. Aren, 12. Tzübo,
- 14. Alia, 16. Angati, 17. Odi,
- 18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.

NAI-A YA METETTER MA

2008 nungi 2023 tashi IPL asayamung nung winner aser Runner up yamai :

Küm	IPL Winners List	Runner up
2008	Rajasthan Royals	Chennai Super Kings
2009	Deccan Chargers	Royal Challengers Bangalore
2010	Chennai Super Kings	Mumbai Indians
2011	Chennai Super Kings	Royal Challengers Bangalore
2012	Kolkata Knight Riders	Chennai Super Kings
2013	Mumbai Indians	Chennai Super Kings
2014	Kolkata Knight Riders	Kings XI Punjab
2015	Mumbai Indians	Chennai Super Kings
2016	Sunrisers Hyderabad	Royal Challengers Bangalore
2017	Mumbai Indians	Rising Pune Supergiants
2018	Chennai Super Kings	Sunrisers Hyderabad
2019	Mumbai Indians	Chennai Super Kings
2020	Mumbai Indians	Delhi Capitals
2021	Chennai Super Kings	Kolkata Knight Riders
2022	Gujarat Titans	Rajasthan Royals
2023	Chennai Super Kings	Gujarat Titans
2024	Not Decided	Not Decided

Outer Manipur LS menden atema candidate 4 tokteptsü



Thokchom Kirankumar, DC Imphal west

Inner Manipur Parliamentary Constituency Returning Officer, Hokchom Kirankumar-i candidate trok indang nominations agizükba den ka indang nomination magizüki liasü.

Imphal, Metsüremi/March 28 (Agencies): Outer Manipur Parliamentary Constituency elections atema candidate pezü indang nomination papers Election Commission of India (ECI)-i agizükogo. Manipur nung election ya April 19 aser 26 nü ta shilem ana nung agitsü.

Scheduled tribe tem atema mekazükja aliba iba Outer Manipur constituency atema candidate kwi asütsü iba indang March 30 nü candidatures agintsüba tatembangbuba anogo sülenang tejangja metettsü.

Candidate pezü rongnung ana political party ana nungi aser ana Independent ama tokteptsü, aser parnok indang nomination paper

tem ya Thoubal district headquarters nung amenoka aliba Inner Manipur Parliamentary Constituency indang Returning Officer office nung Brehostibarnü asadangogo.

ECI-i, Ministry of Finance (Revenue) nung taoba mapang Income Tax, principal chief commissioner alisang Kachui Timothy Zimik Naga People's Front party nungi tokteptsü atema agizükogo. NPF ya regional political party ka lir aser Manipur aser Nagaland nung inyaksangshia arudar.

ECI-isa, taoba mapang Manipur kübok Ukhrul assembly constituency nungi MLA Alfred Kan-Ngam Arthur, Congress

candidate ka ama agizükogo. Maneni independent ticket nungi tokteptsü atema candidate ana indang nomination paper-a ECI-i agizükogo.

Independent candidate ana ya ka Zeliangrong nunger Dr. Alyson Abonmai aser pa den Poumai nunger taoba United Naga Council Tir Kho John ta jangjaogo.

Manipur nung Parliamentary menden ana atema election ya mezüngbuba aser tanabuba shilem nung April 19 aser April 26 nü agitsü.

Inner Manipur menden atema election April 19 nü aser Outer Manipur menden atema election April 26 nü agitsü.

Arunachal: BJP candidate 6 tetokteper melei takok angutsü imlar

Itanagar, Metsüremi/March 28 (Agencies): April 19 agitsü aliba Arunachal Pradesh Legislative Assembly election atema nomination file asütsü asoshi mapang atakzüksü aliba tembanga aruba mapang ka nung Bharatiya Janata Party nungi candidate trok tashi tetokteper melei takok angutsü imlar.

Chief Minister Pema Khandu aser tanga BJP candidate pongu metoktepi dang takok angutsü imlar.

BJP candidate temi takok angutsü imlaba constituency tem rongnung Chief Minister Pema Khandu toktepsa Mukto

constituency densema lir.

Khandu shiba mezüngba Mukto nungi Congress party züngsem ka ama takok ngua liasü, pa 2016 küm BJP nung dena liasü.

Maneni 2019 kuma takok anguba sülen iba tesem nung pa jenjang kanga junga kumogo.

Iba den mesüktepa, Pani Taram shiba tawa BJP nung denogo, pa Koloriang menden nungi takok angutsü imlar. Pa People's Party of Arunachal nungi toktepsa mapang iba constituency nung takok nguogo.

Roing, Tali, Taliha, aser Sagalee constituency tem

nunga tang tashi nung BJP den tokteptsü atema candidate shinga mali, anungji parnoki item mendentem tetokteper melei takok angutsü imlar.

Kasa mapang nung Congress party-i Arunachal West Lok Sabha menden atema Tuki shimogo anungji pa Rijiju den tokteptsü.

2019 election nung BJP-i assembly menden 60 nungi 41 koka liasü aser iba sülen JDU, NPP, aser Congress liasü.

Nomination scrutiny March 28 nü agiogo aser nomination paper agintsü atema March 30 nü ya tatembangbuba anogo asütsü.

Meghalaya: CAA anema longkak aitba sülen nisung ana tepset



Shillong, Metsüremi/March 28 (Agencies): Bodhbarnü nikongtsütsü Meghalaya nung East Khasi Hills kübok Ichamati anasa mejangjaba nisung telok kati nisung ana züksetogo, ta osang ajanga metetdaksü.

Osang ajanga ashiba agi, asür ana ya L Esan Sing aser L

Sujit Dutta ta jangjaogo.

Citizenship Amendment Act (CAA) anema longkak aitba sentong ka ayongzüka agiba sülen tena ya mejangjaba nisungtemi zükset.

Police-i ashiba agi, ozüng alema inyaksangshirtem yagi tensa apir iba maongka agia nisung ana ya tepsettsü asütsü,

shirnok non-indigenous lokti tem nungi liasü.

Ketdangsür tejen kati nisung ana asüba idang osang ya jangjashitsüogo. Parnokisa tasümgang anaprongla ya tesem balala (Ichamati aser Dalda) nung nguteta liasü, ta metetdaksü.

Iba tatalokba ya tang police temi bushisüngdangdar.

Iba tatalokba ya CAA longkak aitba dak sendaka ali mali aji jangjatsü atema police temi bushisüngdangdar.

Kasa mapang nung district ajak nung Superintendents of Police tem dang tensa azüoktsü atema patrol tali yoktsü aser yimjung atema sendentem ayongzüka agitsü tetuyuba agütsüogo.

Senegal tir election nung Faye-i vote shilem 54 angu

Bassirou Diomaye Faye



Dakar, Metsüremi/March 28 (Agencies): Senegal indang tir election agiba nung opposition candidate Bassirou Diomaye Faye-i vote shilem 54 dak tema angu, ta Dakar appeals court ajanga ashi.

Provisional results ya polling stations noklang shilem nungi vote züngdangba nung ajemdaker lir ta court ajanga Bodhbarnü ashi. Iba results ya anogo ishika tsüngta Constitutional Council ajanga agizüksü imlar.

Faye ya tepuokdak nungi

chioker anogo ter dang lir iba takok ya angur. Arishi küm 44 tain Faye-i tang political system nungi anisüngzük aginer ta ashi aser Senegal puti otsü nung tir tanubosang akumtsü.

Ruling coalition candidate Amadou Ba-i vote shilem 35 dak tali angu aser jenjang tasembuba nung alisang Aliou Mamadou Dia-i shilem 2.8 angu ta court-i ashi.

Senegal tir menden nungi alutsü alisang Macky Sall-ia Faye nem tenüngsang agüja liasü aser pai akokba ya

Senegalese democracy atema takok lir ta ashi.

Pai takok anguba yagi sorkar tejenba anema longkak aitba sayur aser tashi tait süaka tashi ajema akumba governing coalition tsüngta telemsa adokba ajiteter.

Faye-i jembiba ya lanurtem asoshi kanga nüngtugu liasü, kong nütsüng yongsük shilem 60 dak tema arishi küm 25 teküpok aser mapa mangu timtemteper.

Senegal nung tir pongu buba shimtsü asoshi election nung nisung million aikati vote agüja liasü.

Yimtenren nung küm asem tashi mepetmesü adoka arur sorkar anema longkak aitba sülen election ya agia liasü.

2021 sülen nisung aika tepsetogo aser noklang aika puogo aser Faye ya apu aser election nübuyim tialong nung chiok.

Senegal nung yimjung nung yimten tashi melenzüksüra West Africa nung democracy asoshi temelenshi ka arutsü, kong 2020 küm nungi mitkar temi tashiyim amshia sorkar atsüngdokba linük ti nung ajangshia lir.

Mitkar anemba telok yaritsü lanurtem kelakoktsü: Min Aung Hlaing

Naypyidaw, Metsüremi/ March 28 (Agencies): Mitkar anemba telok yaritsü atema lanurtem külakokdaktsü, ta Myanmar indang army tekolakba Min Aung Hlaing-i ashi.

Mitkar temi tashiyim amshia sorkar atsüngdoker küm asem jungogo aser taoba küm October ita tatemlen nungi ethnic minority armed groups aser anti-coup forces tem lungjemer ajungbena rara tenzükbba nung mitkar takoksa jenti ajurua lir.

Armed Forces Day atema sepai meyirijang aika adenshia alidak Min Aung Hlaing-i iba o ya ashi. Armed Forces Day ya küm shia mitkar tashi sayuba anogo ka lir.

Telungpuri mapa tamajung inyakba atema lanurtem dak tai tongloksüba ngua temulung shiranger, shirnok otsü tiaziü agi anisar ta pai ashi aser democratic value aser federalism nung ajemdaker union ka tentetsü lenmang raksatsür ta tenüng meteti ethnic armed groups aitsü.

Yimjung tesunep asoshi mitkar temi inyaker aser lungjema alitsü nüngdaker, ta Min Aung Hlaing-i ashi.

Mitkarter parade ya linük yimtiba Naypyidaw nung anü talui agia liasü. Anü tatsük asüba yong nikonkdang agir ta ketdangsurtemi ashir.

Aerial display nung military helicopters aser fighter jets temi shilem agia liasü aser Min Aung Hlaing kinungtsüi sepaitem dak

Min Aung Hlaing



narozük azükja liasü.

Iba sentong nung Russia indang deputy minister for defence, Alexander Fomin ya ano maneni tetushi tesemdanger liasü, kechiaser mitkar temi tashiyim amshia sorkar atsüngdokba sülen linük ana tsüngta tesendaktep tali tajungba akumer.

Russian mitkar lenir aser defence ketdangsür 20 dak tema nem modern Tatmadaw yangertsü mechi international military cooperation nung mapa junga inyaketba atema konang tetushi agüja liasü aser item rongnung Navy chief Nikolai Yevmenov dena liasü, shiba tan ita pa menden nungi atsüngdok, Commander of the Pacific Fleet Viktor Liina aser rong yangluba aser ammunition aser artillery agütsüba nung dena alirtem liasü.

Tatmadaw ya Myanmar mitkar indang official tenüng lir.

Min Aung Hlaing-i anir mitkar temi February 2021 nung civilian lenir Aung San Suu Kyi'er sorkar atsüngdoka kuli tejanga magütsütetaka parnoki election nung tim masüba mapa inyak ta tai tongloksü.

Tashi rakzükba mechi nüburtemi longkak aita linük tesem ajungalen civil disobedience movement tenzük, saka mitkar temi tashiyim amshia telangzüba agütsüba yong nok-nü amer parnok anema nokdaker telok aika adoka nisung meyirijang aikati People's Defence Force (PDFs) tentet aser dangar aika arem leni jena ao aser küm aika yimten yimsüsüba tashi meshia rarar ethnic armed groups tem den aden.

(Maneni tapak 8 nung...)

Mulungnen



ASÜR PANGITSUBA OZUKUM
JANUARY 1921 - MARCH 16, 2024

Onoki teti meima aliba Obala Pangitsuba Ozukum junga alidang, shirangdang aser 16th March 2024 asüba anogo tashi onok temulung zürepa aliba mapang ajak nung balala Lokti, Putu Menden, Arogo aser nijatem shirnokisa temeim sayua nübu aser rongsen agi yariogo kangasa pelaba lemsateper. Obala taküm alidang küm 21 tashi Naga linük asoshi taküm bendanga agüja tenzük aser tenetben tashi tsükchir-i pua tsüngden chiokdak yur temerenshi tapu balala agi rishikangshioko saka Teyanglur Tsüngremi arishi küm 103 tashi wazuka yutsü nung Tulusang Tsüngrem tenüng asanger.

Nenek nem meyipa agütsütsü onok dak tashi mali saka Tsüngrem-i nenok ajak molamoshia moatsütsü onok teimla aser sarasadem.

~ Jala Jabasotem, Kinungertem
aser Semchisemnortem.

Office of the Kangtsüng Senso Telongjem Mokokchung METETDAKTSÜR

Mr. Rongsenlemba S/o Mr. Opangkokba Jamir Kangtsüng, Tir yimyim Adok 25th March 2024 anogo nung nai ozüngi memelaba mapa inyaka aibelenba osang adoka Kangtsüng yim tenüng menüksü nung iba ken o jembitsü na 27th March anogo nung letter (Ref.No.KSTM/MKG/SECY-IV/24/01/25/3/24) ajanga jaok; saka na maru. Anungji iba osang adokba anogo nungi tenzüka anogo tenet (7 days) tsüngta nung na Kangtsüng Senso Telongjem Mokokchung Office atongtsü metetdaktsür. Marura temzüng-ozüng (4) nung ajemdaker tapet temerenshi alitsü.

Sd/- Lima Lemtur
President, KSTM

Sd/- Imlisunep
Secretary, KSTM

Pakistan nung China-i hydro project anena atar

Islamabad, Metsüremi/ March 28 (Agencies): alitsü. Iba lendong atema kiralongrar telok katia tenüng Pakistan kübok Khyber agia mali.

Pakhtunkhwa nung hydropower project ka nung takum Shangla district nung China bendanga agütsür amakba nung nung company Power China nung nisung pongu Construction Corporation of China (PCCC) ajanga KP province kübok Swabi district nung aliba Tarbela 5th province nung hydropower Extension Hydropower Project project dang aka nunga mapa nung civil works anenogo aser ano kasa nung aliba Tarbela 5th province nung hydropower project mapo inyaker 2,000 dak tema mapo nungi anentsüogo, ta mapo nungi anentsüogo, ta Brehostibarnü osang kar ajanga ashir.

Bisham district nung Dasu 1,530 megawatts Tarbela hydropower project nung extension project (T5) nung inyaker mena aliba buss ka mapo anentsüba osang ya nung Mongulbarnü tapoktsü PCCC indang manager oset bena aliba gari kati arua (administration) ajanga atsükdang nisung trok asüba metetdaktsü. Kasa sangdong nungsa project site nung inyaker rongnung China nung pongu aser office staff züngsemtem liasü. 2021 nungi China-i yariba security mechi anenja atar hydropower project nung ashir. inyaker dak takum bendanga agütsür amakba ibai tanabuba

(Maneni tapak 8 nung...)

4buba Lt G. Rio memorial asayamung tasemnübuba asaya osang

Dimapur, Metsüremi/ March 28 (TYO): 4buba Late G. Rio Memorial Men's U19 Inter-District asayamung nung Bresthostibarnü Nagaland Cricket Stadium nung Chümoukedima team-i wicket 9 agi Peren team kokogo.

Mezüng bat amentsü shimba sülen Peren team-i junga masayatet aser parnoki over 21.1 nung asayar ajak out sür run 66 dang yangluteta liasü. Parnok rongnungi Amit Marak (19 runs) aser Bishu (19 runs) nati dang tera junga asayateta liasü.

Chümoukedima team bowler tem rongnungi Aloto Sumi-i wicket 5 agi aser pa

nem Ravi aser Anungsang Lemtur nati teyari agüja wicket 3 aser 1 agia liasü.

Chümoukedima team batting amenba mapang parnoki asayar ka out sür Peren-i yanglur aliba run menepa parnoki asaya ayong ayonga akok.

Bresthostibarnüsa Sovima Cricket Ground nung Niuland team-ia wicket 9 agi Tseminyu koka parnok semifinal-i iogo.

Asaya nung Tseminyu team mezüng batting amen aser parnoki over 10.4 nung asayar ajak out sür run 43 dang yanglutet. Parnok rongnungi Gwakenye Khing-

i dang tera junga asayatet aser pai run 10 yanglua liasü. Niuland atema Lovito Momin-i wicket 3, Abhijeet-i wicket 2 aser Sujit o Adze nati wicket kaka agia liasü.

Run arishiba mapang Niuland-i asayar ka out sür over 6.1 nung Tseminyu-i yanglur aliba run menepa asaya akok. Tseminyu atema wicket ka ya Hyunyelo Khing-i agia liasü.

April 2 nü asaya:
Dimapur vs Kiphire (Nagaland Cricket Stadium | 9:00 AM)
Mokokchung vs Kohima (Sovima Cricket Ground | 9:00 AM).

Miami Open: Medvedev aser Sinner na semifinal asayatsü

Metsüremi/March 28, 2024 (Agencies): Tang asaya aliba Miami Open tebur kija asaya nung taoba küm iba asayamung koker alisang Daniil Medvedev aser world number three asayar Jannik Sinner na semifinal asayatsü.

Quarter final asaya nung Russia nung asayar Medvedev-i kanga toktepa asaya Chile nung Nicolas Jarry 6-2, 7-6 (9/7) agi koka liasü.

Asaya nung mezüngbuba set bo Medvedev-i ayong ayonga akok, kechiyong Jarry-i meylongi asaya liasü.

Ajisüaka tanabuba set nungbo Latin American

nungertemi pusema Chile nung asayar yagi tajungba asayatet aser asayar ana shibai asaya akoktsü mejangjai rally talangla asaya toktep, ajisüaka tiebreaker nung Medvedev takok ngua liasü.

Tanabuba set nung 6-5 aliba mapang Medvedev-i asaya akoktsü atema maongka angu ajisüaka magitet. Iba sülen tiebreaker nung Jarry-i ace ka züklokja point 7-7 aküm saka tanungba point ana junga masayateti pai 9/7 agi makok.

Tebur kija asaya nungsa world number three asayar Jannik Sinner-i 6-4, 6-2 agi Czech nung asayar Tomas Machac kokogo.

Sinner shibai taküm Australia Open nung mezüngbuba Grand Slam kokogo, pai iba asaya ya minutes 91 nung kokatok aser taküm semifinal pezübuba tongtetogo.

Asaya nung Sinner-i Machac indang mezüngbuba serve break asü saka Machac-ia meyiper pa indang srve break süa 1-1 aküm.

Iba sülen Sinner-i maneni service ka break süa pa 4-3 agi tejakdang aküm aser asaya kokatok.

Tanabuba Set nung Sinner-i Machac indang serve tasembuba break asü aser iba sülen asaya kokatok.

Suryakumar Yadav ano IPL asaya ishika masayatettsü



New Delhi, Metsüremi/ March 28 (Agencies): T20 batter tem rongnung temaba jenjang nung aliba asayar Suryakumar Yadav, sports hernia operation agiba sülen ano IPL asaya ishika nung shilem magitettsü. National Cricket Academy (NCA)-i pa temang asadanga atatsü.

Surya asayaba Mumbai Indians pur league nung mezüngbuba asaya ana nungbo

tamakok nguogo aser pa asaya anaprongla nung shilem magi-i liasü.

"Surya taneptsü ngudar aser pa yakta MI nungi asaya tenzüksü. Ajisüaka pa mezüngbuba asaya ana masayaba sülen ano asaya ishika nung masayatettsü," ta BCCI source kati metetdaksü.

MI nungi Surya masayatetaka BCCI-i pa temang kanga junga taneptsü

mangu tashibo masayadaksüner, kechiyong pa West Indies aser USA nung June ita asayatsü aliba T20 World Cup atema kanga tongtibang asayar ka asütsü.

"BCCI atemabo pa World T20 nung asayateter masayateter aji dang tongtibangba lir. Pa Mi nungi asayatsü saka sports hernia surgery agiba sülen pa kanga aritepabo masayadaksütsüla," ta source-isa ashi.

Shots balala aika asayatetba ajanga arishi küm 33 tain asayar ya aiben South Africa nung nungtugu asayar AB de Villiers den medemdanga arudar. T20I asaya nung pa indag strike rate 171.55 lir.

Yadav-i tang tashi nung India tenüng nungi Twenty20 Internationals asaya 60 nung asayaogo aser iba mapang century pezü yangluba densema run 2141 yanglur lir.

Hombarnü MI pur Rajasthan Royals den asayatsü, koba taküm home ground nung mezüngbuba asaya asütsü.

BENDANGLI OSANG : Tapak 7 nungi...

Mitkar anemba telok yaritsü lanurtem...

Anti-coup sepaitemi taoba küm Operation 1027 tenzüksü sülen parnoki northern Shan aser eastern Kayah state tem nung tajangzük nguogo aser western Rakhine state nunga alinük agitar. Danga region tem nunga asendenshir raratar.

Iba rara nung nisung million ana dak tema pei ki yutsür tesem balala nung jenoka lir ta United Nations-i ashir aser Assistance Association for Political Prisoners-i civilian 4,791 asüba jangjaogo ta ashir.

Taoba ita mitkar temi mapang talangka nungi jembia aruba conscription law mapa kuma amshitsü ta sangdong, kong tebur arishi küm 18 nungi 35 aser tetsür arishi küm 18 nungi 27 tsüngta alir ajak mitkar mapa nung küm ana tenzüksü shia lir.

Min Aung Hlaing-i iba draft ya nungdakba mera ka lir ta ashi, saka iba yongji lanur meyirijang aika linük yutsür jena aotsü merang aser Yangon nung aliba Thai embassy nung visa meshir nisung jenti liasü.

Armed Forces Day nungtem nung Britain indang Minister for the Indo-Pacific, Anne-Marie Trevelyan-i

sangdong ka agütsüba nung, mitkar kabu nung nüburttem azüdokshi yimya balala ajurua timtemtar, ta shia liasü aser Canada indang embassy-ia mitkar inyaksangshi khukhua aitsür ta ashi aser nok-nü aser tayimtsü nung amshiba totzü nokdangtsü ayongzük.

Ajisüaka Min Aung Hlaing-i, international journalists aser social media amshirtemi osang tiazü bener mitkar dak tenük yoker, ta ashi aser tashi tulu linük kari Myanmar linük telungzük inyakyim nung teka sangshitsü meranga armed anti-coup telok tem yarir ta ashi.

Army tekolakbai teti jembiba saka anogo lateta maliba elections indang nunga kongshia jembia.

Mapang telatet ka magüjaka pai elections tasen agitsü maparen inyaktar ta ashi saka ethnic armed groups aser PDF fighter temi election menudaksütsü mapa inyaker ta tai tongloktsü.

Mitkar temi sorkar atsüngdokba sülen benokba state of emergency ya February ita ita trok asoshi atsülanga lir.

Pakistan nung China-i hydro project...

Security mechi mapa inyaker 2,000 mapa nungi anentsüogo, ta ashi. Ajisüaka pei section nung tekolak puri ajaba staff tem dang mapai arutsü, ta manager-i ashi.

Tarbela project nung Awami Labour Union indang general secretary Aslam Adilia iba temelenshi indang jangjatsüogo saka labour laws kübok mapa inyaker mapa nungi anenja ataba ya pei mapa agientsüba masü saka parnok tanaben mapa inyak metenzük tashi itasen tesadang angutsü ta ashi.

"Kedangsürtemi project employees temi akhangba ama security tashi itshitsü," ta pai ashi.

Mapa anena ataba ajanga T-5 renemtsüba nung memonutsü, koba World Bank (USD 390 million) aser Asian Infrastructure Investment Bank (USD 300 million) teyari nung May 2026 nung renemtsü nükjidong lir.

China nungter ya Dasu hydropower project nung

inyaka liasü, koba Islamabad nungi north tsütsü kilometre 300 shi pilar lir.

4,320 MW project ya China Gezhouba ajanga World Bank teyari nung yanglur. China nungter densema iba ama amakba ya July 14, 2021 nung mezüng atalok, koba Kohistan nung Dasu dam nungi kilometre ishika pilar liasü. Iba lendong nung China nungter engineer toku aser Pakistan nungter nisung ti asü aser 23 yiru.

Pakistan nung China nungter mapa inyakertem kimzüka ayutsü mechi mera agia mapa tamajung inyakertem pua merenshitsü Beijing-i Islamabad dang ajungshiba sülen Pakistan Ato Kilonser Shehbaz Sharif-i bushisüngdangtsü Bodhbarnü totuyuba agüja liasü.

China nungter meyirijang aika Pakistan nung sen USD 60 billion China-Pakistan Economic Corridor (CPEC) kübok project balala nung inyaker.

BILEMDANGANG

"Na pela linüra dangar asoshi tajung bilemang."